

四庫全書

史部

欽定四庫全書

史部

蜀中廣記卷六五

詳校官編修臣翟槐

編修臣程嘉謨覆勘

總校官庶吉士臣何思鈞

校對官學正臣陳永

謄錄舉人臣羅允文

欽定四庫全書

蜀中廣記卷五

明 曹學佺 撰

名勝記第五

川西道

成都府五

新都縣

華陽國志蜀以成都廣都新都為三都號名城古語云

廣漢有二雒新都為上雒建寧中江為下雒也 寰宇
記云新都縣本漢舊縣屬廣漢郡後置新都郡故城在
今縣東太康中又為縣隋移理於此按晉史武帝咸寧
二年封子該為新都王以新都郡為新都國矣 唐張
說新都南亭送郭元振盧崇道詩竹徑女蘿蹊蓮洲文
石隄靜深人俗斷尋玩往還迷碧潭秀初月素林驚夕
棲褰幌納蟾影理琴聽猿啼佳辰改宿昔勝寄坐睽攜
長懷賞心愛如玉復如珪歐陽詹新都行云縹緲空中

絲篴簫道傍樹翻茲葉間吹惹彼花上露悠揚絲意去
其弱花枝住何計脫纏綿天長春日暮宋陸游早發新
都驛詩喔喔江村雞迢迢縣門漏河漢縱復橫繁星明
如晝愛涼趣上馬未曉閱兩堠高林起宿鳥絕澗落驚
猿寺樓插蒼煙沙泉瀉幽竇我行忽萬里坐歎關河富
貴如廣文冷面作拾遺瘦今年盍歸哉勿落春雁後新
都驛有遠平軒劉望之題云霜晴木落送歸鞍袖手微
吟北窗顏賸欲憑欄招白鳥更煩剪樹出青山晚悲薄

祿非三釜賴許清時見一斑看到遠平纔得恨我寧歸
臥尺祿間自注云軒有外氏周次元帥蜀詩也 本志
云治北半里寶光寺後有柱礎圍丈二尺圓徑二尺高
尺八寸唐僖宗避黃巢至蜀遣御史賁璽書召知元國
其處掘地得石函中有如來舍利尋建浮圖以
塞之明荆精藍曰寶光 寰宇記云麗元山在縣北八
里平之特起四絕高三丈有雙石鏡廣五尺嘗掘其下
至水而未臻其極 本志云縣北十五里二石闕各高

丈三尺一題云漢故兗州刺史雒陽令王君稚子之闕
一云漢故先靈侍御史河內縣令王君稚子之闕闕兩
角有斗又作重屋四壁刻神像人物牛馬之類今已漫
滅詳畫苑中 寰宇記云八陣圖在縣北三十里彌牟
鎮蜀志亮推演兵法作八陣圖咸得其要李膺益州記
云稚子闕北五里有武侯八陣圖土城四門中起六十
四魁八八為行魁方一丈高三尺緯略曰八陣圖在新
都者峙土為魁植以江石四門二首六十四魁八八成

行兩陣並峙周凡四百七十二步魁百有三十也 陸
游九月十日如漢州小獵於新都彌牟之間投宿民家
詩云適從邛州歸又作漢州去天底慘欲雪遊子悲歲
暮十年辭京國疋馬厭道路野火炎高岡江雲暗空戍
角弓寒始勁霜鶻飢更怒邂逅成小獵尺箠聊指呼北
連武侯祠南並稚子墓合圍蹙窮鹿設伏截狡兔壯哉
帶箭雉耿介人不顧吾寧暴天物戰法因得高黃昏過
民家休馬燎裘袴割鮮盛燔炙毛血灑庭戶老嫖亦復

平汎掃邀我駐大夫倘未死千金酬此過 古今集記

云新都南十七里有宋興成山高百四十丈週三十餘
里山色赤岸邊若有火光又名赤岸益州記云赤岸山
下有湧泉週迴數丈深八九尺澄澈不竭 龍門山在

城南二十里趙抃次孫直言九日登龍門山詩皇祐二
年秋九月九日龍門過佳節新都大夫孫隱之報政優
待共民悅升山高會賓主俱滿頭黃菊泛茱萸遙開醉
眼極千里身高氣爽胸懷舒遲時感物以次發詩成落

落傾瓊珠初言府政好太守化行歲稔民力蘇喜聲協
氣邀以狂稚子負老老者扶又言登臨風景異澄川秀
野如披圖殊方真賞到奇處未來空只誇江湖得之獨
善不在已遠遣遺我開煩紆嗟我江原亦民長周遭百
里平如掌簿書役役甚囚拘聞有岷峨無計上及聞治
邑茲山奇脚力不到神魂馳誰知我亦好山者篋中時
復觀君詩 西南十五里有繁陽山與新繁接錄異記
云繁陽山麻姑洞即二十四化之第一陽平之別名也

在繁水之陽因以為名本際經云天師張道陵所遊太
上說經之處在成都府新都縣南渡江十五里衆山連
接孤峰特起是也神武皇帝潛龍之時光化二年己未
五月四日丙申山土摧落洞門自開縣吏時康道士張
守真等以事申府云自洞門開後每日有百姓往來者
府差縣典楊澤畫工任從與守真同往檢覆畫圖申上
稱把燈燭入洞看檢其第一門對北高二尺濶三尺五
寸入至第二門約五尺己來第二洞門方一尺六寸入

內並是黑處長一丈二尺濶六尺有石窟兩處在東畔并西南有洞門兩路南畔一路圓濶一尺六寸入內長一丈二尺濶一丈高四尺南畔有石窟三處西畔兩路入內通遶門圓濶一丈七尺內各濶五尺高六尺已來門相去一丈門屋一所高五尺濶四尺從內往來有刻料拱甌瓦約山作石日月兼作日字月字隔子房一所濶二尺五寸高一尺五寸刻料拱甌瓦石竈一所高一尺濶一尺五寸門濶五寸石窟三處各濶七尺又西入

洞圓潤一尺七寸灣曲入向南門屋一所高六尺潤
口尺從古不往有石料拱甌瓦又有竈模兩所共一牀
高一尺潤二尺三寸門潤八寸有石料拱西北角又有
一四方一尺六寸內方二丈已來南畔西畔北畔各窟
一四方一尺六寸一洞圓潤一尺六寸已來將燈燭近前
右有石穴即滅更入不得其洞連接繁陽本山相
去三里已遠諸生張賢等狀稱繁陽是古迹山每准
元有往往閑塞元和中南康王韋臯

人咸云洞開即年豐物賤尋又閉塞至
是歲其後果遠近豐稔洞本名麻姑山側有麻姑宅
是山名之也

雙溪縣

縣志云都縣在蜀郡西三十里漢元朔二年置
有雙溪之饒江有魚漕梁山有鐵鑛江西有安稻
田二畝之水二十里 唐司空曙送柳震還蜀詩白
日雙溪鳥鳴蜀國春桐花能乳烏竹節競祠神蹇步

徒相望先鞭不可親知從江僕射登榻更何人宋李新
廣都道中詩萬花織籬凡幾曲繡屏處處圍茆屋家貧
張日無羅幕東風吹開莫吹落居人應笑行客癡春去
春歸殊不知予以庚戌暮冬過此作詩云萬里橋方度
雙流徑即存薄寒成翠色疎雨點黃昏竹栢密他樹水
雲平過村林鳥棲欲盡纔到縣西門古跡有盤古祠
徐整三五歷記云天地渾沌如雞子盤古生其中八萬
四千歲天地開闢清陽為天濁陰為地盤古在其中一

日九變神於天聖於地天日高一丈地日厚一丈盤古
日長一丈如此滿八萬四千歲天極高地極深盤古極
長後乃有三皇數起於一立於三成於五盛於七處於
九故天去地九萬里也此寰宇記所引羅泌路史亦云
于廣都得盤古之祀矣 有大塔山陰宏道益州山川
圖云阿育王使鬼兵造八萬四千塔廣都有其一 有
商瞿里本志云治東十里瞿上鄉有孔子弟子商瞿上
墓時有錦鷄白鵬見焉文明之德未艾也 有宜城山

寰宇記云宜城山在縣東南十里李膺益州記云宜城
在牛飲水南今按紫草山岡阜相屬高百餘步連入陵
州賁平縣界是矣周地圖云清水在縣北十里改名牛
飲水李膺記云水名客舍昔程鄭家於此每羣牛飲江
為之竭故名按蜀漢尚書蔣琬宋布衣李甲宅俱在宜
城山下茂林清泉致可喜也 有公孫述墓寰宇記云
在西四十里高三大墓內銅作網結雖遭亂世莫能侵
毀有葛陂本志云治北十里龍池舊名葛陂道漢費長

房至此以杖擲陂中化龍去 天師觀紀勝云在廣都
縣北張道陵祠也壇下有井名伏鬼井趙閱道記華陽
縣衡山有井妖怪藏其中道陵運石以鎮之鬼妖乃絕
邑人為立祠植杖井旁今為喬木曰戒鬼木矣 有朱
辰墓華陽國志云漢時縣民朱辰字元燕為巴郡太守
甚著德惠辰卒官郡獫民北送及墓獫蜚鼓刀擗踊感
動路人於是葬所草木頃許皆倣其曲折迄今蜀人莫
不歎辰之德靈為之感應今朱氏為首族也 有牧馬

川寰宇記云在陵州北一百二十五里蜀先主于此置
藉田牧馬在江中俗因名牧馬川今割屬廣都縣本志
云在縣東南八里有龍華山唐詩紀事段文昌字墨
卿別業在廣都縣之南龍華山嘗杜門力學于此俗謂
之段公讀書堂長慶初朝議文昌少在西蜀諳詳利病
詔授劍南節度使有邑人贈詩曰昔日騎驢學忍饑今
朝忽着錦衣歸等閒畫虎驅紅旆可畏登龍入紫微富
貴不由翁祖致文章生得羽毛飛廣都再去應惆悵猶

有江邊舊釣磯

文昌還別業有尋龍華山寺廣宣上

人詩云十里惟聞松桂風江山忽轉見龍宮正與休師
方話舊風煙幾度入樓中郭震題龍華山詩云昔年曾
到此山回百鳥聲中酒一杯最好寺邊開眼處段文昌
有讀書臺何耕題文昌讀書臺詩云段公曾此讀羣書
讀破應須萬卷餘家禮一傳為雜俎稗官收採附虞初
按方輿勝覽文昌讀書堂在廣都縣順聖寺南碑目云
龍華院山門路記後唐天復七年立今為觀音院矣

何科題龍華佛閣詩云西川鑿山三大像突兀皆在江
之濱修梁九頂見略盡獨此恨未瞻容儀竭來勝地了
昔軒輓馬相追隨百尺金軀信雄傑三乘寶閣何
現矣然豈不用照幽鬼擊鼓自合趨馮夷前人開創願
力盡下與舟楫扶傾危六月灘濤劇奔吼一分性命爭
毫釐焉二三隱行者泣彈指乞活天人師人心狎水水
多獨力在人人不知年來蜀產坐股削夜半有力真
能移我輕大舸去不絕綠鷁破浪風揚旗佛慈只作布

地起江神雖想將何為又題龍華山寺云傑閣山為佛
精廬地布金水涵空澗淨路繞翠微深鳥下窺齋鉢龍
馬談梵音城古應昧目那得此幽尋又龍華大像蓋冀
國夫人所作因成絕句云慧性元從戒定薰百花潭水
流僧福靈石力量真超絕故老尚傳娘子軍 有郭信
可隨居即郭印也何耕題其雲溪詩云幽居定何如頗
恨未見之主人向我言喜色融雙眉脩篁流翠陰寒溪
漾清綠發幽一狀幽妍發餘姿主人信妙士得此固

所宜又題浮翠橋詩云隔溪蒼翠各西東架竹為梁路
始通缺月鏤林凝淨綠斷霞明水抹殘紅芒鞋步步幽
深處藜杖聲聲屈曲中回首忽驚橋已遠冷然身御圃
田風寒碧亭詩云憑欄日日俯清湍洗竹年年斬惡竿
十頃琉璃秋色淨一林竿籟曉聲寒涼風有意生天末
明月無邊照水端誰謂過清難久處愚溪元自不相安
遠色閣詩云小小樓居著散仙淵明真趣本悠然招呼
雲月闌干曲顧揖江山拄杖前獨鳥倦歸翻落日誰家

晨爨起疎烟根塵應接無留礙笑殺胡僧面壁禪假山
詩云空庭幻出小嶙峋假外應須別有真只恐話頭成
兩撥若為融攝主和賓蓮塘詩云色香無比出西方何
物妖狐號六郎手折一枝聊供佛前身定是老柴桑蘭
坡詩云蘭與高人臭味同含薰聊復待清風紛紛蕭艾
毋相笑爾輩敷榮轉眼空龍淵詩云門前大江何渺漫
昔人飲牛水為乾水乾龍逝亦其理近在咫尺聊泥蟠
魚蝦玩侮獮獮笑縱有靈怪誰當看德人問舍壓吾境

便爾築室相遮欄坐令異類皆屏伏恃有此耳差少安
却紆朱紱去監郡遣我守舍良獨難昨來過門恍如夢
龍致此語催歸鞍先生不信反大笑謂我饒舌狂豐干
虛舟詩云君不見江臯車馬紛相送巨觚戕戕船載重
西南使者解官歸水淺着沙牽不動如君材具豈多得
合侍明光參法從胡為淺瀨著虛舟頗肖胸中太虛洞
問君此意竟安在欲說向人誰與共山林鐘鼎本同轍
繫岸截江隨所用八窓窅窅淨無塵一水泠泠清可弄

何當挹被過君眠
分破江天幽夜夢
忘機臺詩云太虛
生微雲機事日夕繁
兼忘豈不佳尚有忘者存稽首老
龐翁妙處希一言
請觀堂上月萬古無昭昏和光亭詩
云枯木倚寒巖三冬無暖氣
達人定汝笑胸中太涇渭
不妨聲色海徑造佛祖地
所以亦樂翁花前時一醉

郾縣

華陽國志張儀城郾周回七里高六丈上置樓觀射圃
與成都同制晉元康三年民謠曰郾城堅盜底穿郾中

細子李特細蓋李特自稱益州牧治此城也 寰宇記
云犀浦縣周垂拱二年割成都之西鄙置蓋因李冰所
造石犀以名杜甫詩南京犀浦道指此在縣東二十里
本志云縣治儀門下穿洞直通犀浦極深敞高可十尺
許每夜月中天洞中曙光如晝古謂之明月洞又云治
內東土臺墳起下有池其底有井謂之郫筒井井畔產
巨竹剝為筒汲水而釀包以蕉葉纏以藕絲信宿香達
于外或云山濤治郫以筠釀醪酒旬日香聞百步今

池井俱存竹則不產一云池中土臺突起列方圓二井
名鴛鴦井也 成都文類諫議司馬池尉郫之明年生
子光於官解字之曰岷以山稱也於是諫議公手植枏
樹一本于庭及溫公歿後若干年郫邑李丞作堂祀公
且以護樹張行成記之 楊雄蜀紀云杜宇一名杜主
代魚鳧王蜀徙都于郫即杜鵑城也後傳其位于鼈靈
宋陳臯記云杜宇鼈靈墓在郫縣南一里二塚對峙若
邱山俱隸淨林寺二里 勝覽云郫縣有子雲讀書堂

本志云縣南二十里外子雲亭即葬所也亭北半里有
拜臺相傳為拜子雲墓而築 寰宇記云郫縣有漢司
空何武宅武之弟攀從刺史王濬伐吳有功歸家闔門
治疾不預世事武之後隨有養竹園人盜其筍隨遇見
之恐盜者怖走或傷其手足因挈履徐步而歸矣 紀
勝云郫縣有張白雲先生故居范鎮留題張少愚屋壁
詩云高隱郫城下平時仍往還門開值冠蓋簾卷為江
山沛雨人間待片雲天外閒泥封詔不起朝夕奉慈顏

文同題張公愚書院詩云澗水浸斷橋車馬不得通飛
嵐積庭礎秋蘇垂紫茸窓紙爛溪雨簾衣折林風主人
殊未歸使我烟景空 水經註云江水又東北逕郫縣
下縣民有姚精者為叛夷所殺掠其二女二女見夢於
兄曰當以明日自沈江中喪後日當至可伺候之果如
所夢得二屍於水郡縣表異焉 古語云郫縣七十寺
分布四郊內其最著者法定寺高僧傳云法定寺是漢
永平年佛法初入中國時建後晉惠遠寓居著神異至

隋始改為法定焉寺有彌勒聖像乃江流枯查所製唐
貞觀長史高士廉蓋殿以安之有僧汎愛者樹其浮圖
獲巨蟹身長二尺餘此塔嘗被霆擊而復合為釋惟忠
所禱云

新繁縣

水經註云成都江北則左對繁田文翁又穿湔洩以溉
灌之凡一千七百頃蜀漢延熙十年涼州胡率衆降增
戶于此俗間謂之新繁也禹貢曰岷山導江東別為

沱孔安國註云江東南流沱東行鄭註云此沱尾入江
不於江出晉太康地記云江沱在繁縣蕭廣濟註江賦
云觸玉壘山東迴為沱據漢書溝洫志此江即秦守李
冰所鑿非禹貢之江沱明矣本志云李冰導水見水勢
橫突乃鑿九井象九宮以厭之元末井堙塞新建石橋
存志云衛湖蜀漢縣令衛常所開在學宮後又有東
湖李德裕為宰日將開此湖夜夢一老父曰某潛形其
下幸庇之明府富貴今鼎來七九之年當相見於萬里

外也明日於土中得一墓徑尺餘乃投之水後德裕果至宰相六十有三卒於朱崖應其夢焉按宋侑衛公堂記略繁江令舍之西有文饒堂者舊矣前植巨楠枝幹奇怪父老言唐李衛公為令時鑿湖于東植楠于西堂之所為得名也志又曰宋蘇實治平間為繁令有異政嘗厭衛湖蛙鳴令人取一大者以硃點之戒曰毋再喧囂已果不鳴及湖中涸羣蛙結聚成團啓視之則硃點者居中羣蛙若擁翼焉蘇令悉放于江終其任湖蛙

無一鳴者 唐初隱士朱桃椎茅茨賦云若夫虛寂之士不以世務為榮隱遁之流乃以閒居為樂故孔子達士仍遭桀溺之譏叔夜高人尚被孫登之笑况復尋山玩水散志娛神隱卧茅茨之間志想青雲之外逸世上之無為亦處物之高致若乃覩余庵室終諸陋質野外孤標山旁迥出壁則崩剝而通風簷則摧頽而瀉日是時閒居晚思景媚青春逃斯澗谷委此心神削野藜而作杖卷竹葉而為巾不以聲名為貴不以珠玉為珍風

前引嘯月下高眠庭惟二運琴置一弦散誕池臺之上
逍遙巖谷之間逍遙兮無所託志意兮還自樂枕明月
而彈琴對清風而緩酌望嶺上之青松聽雲間之白鶴
用山水而為心翫琴書而取樂谷幽偏覺鳥聲嬌聲高
韻細盡相調見許毛衣真亂錦聽渠聲韻宛如歌調絃
乍緩急向我茅茨集時逢雙燕來屢值遊蜂入冰開綠
水更應流草長階前還復濕吾意不欲世人交我意不
欲功名立功名立也不須高總知世事盡徒勞未會昔

時三箇士無故將身殞二桃贊曰先生知足離居盤桓
口無二價日惟一餐築土為室卷葉為冠斲輪之妙齊
扁同觀文苑云新繁朱桃椎茅茨薛稷為之賦序略云
穗臥茅茨之間屬想青雲之外逸世上之煩襟遂明時
之高志而已矣宋楊甲謁朱真人祠詩云一濯巖下溪
再拜巖中庭清風瀟然來吹我衣上脰仙人芙蓉冠乘
月下雲輶山空雜佩響靜夜朝百靈似聞客欲去小語
猶丁寧肅肅上松栢急以兩耳聽寂寥古壇外但見斗

與星天明恐是夢恍惚遺心形去飲石上水再讀幽人
銘青山無行迹霧雨空冥冥又有勾氏者隱于盤溪
成都文類勾景泰詩云黃塵沒車轂平地得林邱花木
風光早陂池煙雨秋不彈長劍缺甘賦大刀頭九軌利
名猶逢君應少瘳又從俗鮮所得九牛中一毛強牽麋
鹿性要學豹龍韜野服顏常好晴窓首自搔回來誤應
聘塵土汙吾袍又客至輒命酌為言花已開青山長委
髻白骨舊生苔不飲固癡絕能詩宜數來頗憂明日雨

紅紫落成堆又勝簪不肯黑浮白故能紅心寄塵埃外
春歸杖屨中徑松青謾謾庭草碧茸茸無術繫白日年
光如轉蓬按盤溪主人勾友于字信卿李石記云有樓
以藏書堂以教子臺以賦詩榭以置酒自誓曰俗子污
我不我門凡士門我不我室清風肅戶明月贊席抱琴
之童挾卷之士照映几杖之側徜徉筆硯之間

溫江縣

華陽國志魚鳧王田于湔山忽得仙道蜀人思之為立

祠成都文類孫松壽觀古魚鳧城詩野寺依脩竹魚鳧
迹半存高城歸野壠故國藹荒村古意憑誰問行人謾
苦論眼前興廢事煙水又黃昏註云在溫江縣北十里
有小院存按漢文苑資中王子淵以宣帝神爵三年有
事蒲上作僮約文即此縣也 寰宇記云魚水在溫江
縣李膺記相林寺前清魚二水是矣任愷渠堰志云九
昇口堰其源出於魚江至郫之柵頭別流為溫江口而
九昇口者實兩江之匯也杜甫陪李七司馬魚江上觀

造竹橋詩伐竹為橋結構同褰裳不涉往來通天寒白
鶴歸華表日落蒼龍見水中顧我老非題柱客知君才
是濟川功合歡却笑當年事駢石何時到海東趙抃早
離溫江夜泊白沙步詩曉與諸孫別依然頗動懷去乘
蘭棹穩行得綵衣偕漁父遙連市村扉半掩柴夜來溪
上宿夢已在高齋 宋史哲宗紹聖四年夏四月八日
有芝生于溫江縣觀音院齋廳之楹一本而數結煙縷
氤氳間月不散邑令孫漸扁其處曰芝堂而為之頌云

西母薦祉金精効奇是生神草雲英瓊蕊給園之中前
水之湄地其幽矣芳而孰知陟彼岷宮真人頎頎夜援
秘訣謂余塞之沃之醴泉濯之天池羞以石髓茹而忘
飢黃綺為侶喬松可期盍獻天子以薦神祇 古今集
記治西三里之金烏池唐高宗曾夢金烏集于益州巨
木上遣使訪至此見烏三足而金色浴于此池志云今
有金烏觀存 集記溫江治西三十五步有女郎祠張
天師孫靈真之女名玉蘭者幼不如葷十七夢吞赤光

感孕為母所責一夕無疾而卒有一物如蓮花自腹中
出開視之乃本際經十卷葬百餘日雷雨晦冥失經所
在墳壙自開而飛昇棺蓋掛于巨木之上此三月九日
事鄉人至今如期齋祭之按郡國志梁州女郎山張魯
女浣衣石上感赤光之祥而懷孕生二龍及女死將殯
柩車忽騰躍升此山遂葬焉其浣衣石猶在因謂之女
郎山其說畧同

彭縣

志云縣西北三里有劉宋時晉壽郡城梁東益州西魏
天水郡後周九隴郡唐武德之濠州垂拱之彭州皆理
此 寰宇記云濠陽縣唐儀鳳年于濠江之北置故曰
濠陽蓋彌濠水源出九隴縣來經當縣南二百五十步
本志云東二十里之濠陽鎮有故縣址

志又云北三十里之二郎鎮乃九隴縣址以九隴山為
名寰宇記云九隴山自永昌縣連亘至縣界屈曲而九
折也方輿云九隴者古彭州之西山一伏隴二豆隴三

秋隴四龍奔隴五走馬隴六駱駝隴七千秋隴八較車
隴九橫擔隴故有九隴之名 陸放翁云天彭號小西
京以其俗好植牡丹有京洛之遺風古今雜記孟氏以
牡丹名苑于時彭門為輔郡典州者多其戚里得之上
苑此彭門花之始也天彭亦謂之花州而牛心山下謂
之花村云 治內有東湖元符中袁鵬記云九峰高峙
濠水濬發樓閣亭軒隱見于茂林脩竹間又有西湖元
和中守王潛蕭祐創進士鄧袞記云二公陶奇撰幽不

之心匠于西湖臺島花竹布置罔不宛妙也 勝覽

云南樓在郡圃中范百祿有記文同彭州南樓詩云百
尺壓城端飛簷欲上搏湖光搖埤堦山影轉欄干秀野
含春煦喬林擁暮寒回頭大岷雪千仞正巔岼 勝覽
又云望雪樓在子城上唐彭州守建以望雪山太和進
士鄧衮銘曰維蜀之鄙截如巨砥厥郡維彭西北天屏
危碧峭青夏霄摩冥鯨跳虬奔限蠻隔番上排雪峰延
疊萬重鶴甍瑤軒月積綃鮮振古不泐四節一色皎皎

披飄寒澗陰膠光涵二水冷射千里往哲所嘉名之玉
壘也 高適為州刺史彭州山行詩云峭壁連崆峒攢
峰疊翠微鳥聲堪駐馬林色可忘饑怪石時侵徑輕蘿
乍拂衣路長愁作客年老更思歸且悅巖壑勝寧嗟意
緒違山行應未盡誰與玩芳菲蘇頲贈彭州權別駕詩
雙流脉脉錦城開追餞年年往復迴祗道歌謠迎半刺
徒聞禮數揖中台黃鶯急轉春風盡班馬長嘶落景催
莫惜分飛岐路別還當奏最掖垣來 集古錄載秦李

冰為蜀守鑿山導江以去水患其神怒化為牛出沒波
上君操刀入水殺之因刻石以為五犀立之水旁與江
誓曰後世淺無至足深無至肩謂之誓水碑立在彭州
馬端臨云彭州掘地得絳帖舊本字畫清勁頗類舊武
岡而差優也 寰宇記云九隴縣灌口鎮之城西有王
女祠祠西有蜀守李冰祠存 五代史補蜀王衍與其
太妃遊青城山遂至彭州陽平化志云今金城山之仙
居觀是其駐蹕所也金城山形如城上應角宿即二十

四化之陽平治矣 志又云治北五十里白石溝即清沅治也上應房宿治有鴻都觀下觀名曰響石寰宇記以清沅作麗元云范蠡學道於此又云五龍山有神溪水仙人李伯陽登山嗽之今為溪源山高數百丈延袤二十餘里山麓有洞旱時祈雨巫者初入握火燭之行少頃跂足而望懸崖中有斧鑿痕如井深數十百丈踰一線之明而烟焰裊然上衝謂之天生眼至此少偃息復入第三四五六洞洞下重淵深不可測盛夏水冷如冰

以編竹筏寢其上逡巡蟻附而入抵第七洞龍所穴也
始用符呪取水盛竹筒而出離洞口即有風雷隨之而
雨作焉間值洞中水壅巫者多不得出 勝覽云葛仙

山有崇真觀在濛陽北四十里二十四化之第五化也
葛仙翁瓚楊仙翁昇賢於此得道大同中蒲仙翁高遠
復於此白日上昇梁武錫名上清觀劉孝先作碑以紀
其事按成都記韋臯夢神人謂曰異日富貴無忘葛瓚
也後尹成都再夢乃復新觀字臯自為記雲笈七籤云

葛瓚化週迴巖巒左右嵌穴地靈境秀迴絕諸山故有二十四峯八十一洞觀下有礫泉深在谷底汲之非便此宮之西過崖磴十五步巨石下有丁東水出於崖腹滴入窪石竅中中和年刺史安金山准詔投龍郡縣參從者三百餘人忽有汚觸其水者頃刻乃竭安公與道流頗懷憂懼夜至泉所拜手焚香叩祈良久涓涓而滴雖從騎之衆食之充足每年三月三日蠶市之辰衆逾萬人宿止山內飲食之外水常有餘矣 勝覽云至德

山在郡西三十里上有廣明院蜀王衍專事遊幸嘗登
是山患其高險令於福唐寺東別開一徑凡數里廣可
二丈栽松砌石以達于寺從官悉騎以從松枯石怪尚
有存者本志云至德山有三昧泉自石竇噴冽方大如
斗不竭不溢俗傳即知玄國師洗人面瘡之處至今疾
者澆之多効按高僧傳釋羅僧者蜀聖寺中得果位人
也嘗寢疾於五臺山同會僧衆俱不之測悟達國師獨
善視之將及九旬病愈別去云所苦今遂平復由師之

力我住在劔外九隴郡之茶籠山爾異日遊方無忘相訪也悟達暮歲至蜀歷訪羣峯訊老樵輩皆以未嘗聞茲山名乃嘆曰噫病禪之妄也將回遇一山童曰某是彼巖之聚沙者前導而去俄覩殿塔儼空房廊環肅果值昔之病僧迎門叙故日將暮矣而謂之曰茲寺非得漏盡通不能至爾以宿緣一詣邁止言寄寓乎斯為未可爾其克勤脩證詣果胡難乃命舊童送師歸去迴望之頃但見巖壁峭峻杉檜莽蒼而已則開成中事也時

知元著傳之次得僧可思尤閑地理為元作塋兆于丹
景前峰其山若雉堞狀雖高低起伏而中砥平俄有里
人耆老曰古相傳云茶籠山矣志云縣北三十里丹
景山舊志以為山時牡丹春時紅艷照人故名其前為
彭門山兩山對峙懸崖絕壁相去數百步如門即天彭
門也或曰彭祖徧游洞府以窺聖迹嘗往來于其中五
代史補偽蜀太后徐氏題丹景山金華宮詩云碧煙紅
霧撲人衣宿露蒼苔石徑危風巧解吹松上曲蝶嬌頻

採臉邊脂同尋僻境思攜手暗指遙山學畫眉好把身心清淨處角冠霞帔事希夷太妃徐氏和云丹景山頭宿梵宮玉輪金輅駐遙空軍持無水注寒碧蘭若有花開晚紅武士盡排青嶂下內人皆在講筵中我家帝子傳王業積善終期四海同寰宇記云白鹿山在九隴縣北五十里周地圖記云宋元嘉九年有樵人於山左見羣鹿引弓將射之有一麋所趣險絕進入石穴行數十步則豁然平博邑屋連接阡陌周通問是何所有人

答曰小成都後更往尋之不知所在 勝覽云白鹿山
有大乘金覺禪寺本晉佛圖澄所建上有洗腸池按大
同志晉太安二年羅尚殺隱士劉敬敬故州牧劉璋曾
孫也隱居白鹿山高尚皓首未嘗屈志尚信妖言而殺
之矣 輿地紀勝云彭縣大隋山之景德寺大業中神
照禪師投錫之所有木禪菴白龍井山生竹若龍頭俗
呼龍頭竹勝覽云大隋去堠口鎮三十五里神照所居
有瀑布張天覺記云西山之勝在彭門者大隋為甲郭

印詩云我聞大隋名夢寐猶記錄得檄天彭道喜氣知
可掬出城六十里崎嶇轉江曲山門忽斗上危步依筇
竹崩石帶煙雲異草羅澗谷寂鳥下窺人累猿時掛木
路窮纔見寺金碧煥雙目祖師古定光燈冷無人續開
公生異世大事如付囑僧言山長陰朝暮雲容感茲辰
為我晴疊岫堆濃綠虛閣倚秋風一洗塵土俗舉手揖
丹景橫身跨白鹿十年勞問訊親到心始足坐久燭漸
微借榻雲間宿山寒寐不成窓外泉鳴玉 高僧傳彭

州土溪智院子言菴主綿州人也初至大隋聞舉石頭
和尚示衆偈倏然領旨歸隱土溪懸崖絕壑間有石若
蹲異獸師鑿以為室中發異泉了無涸溢四衆訝之居
三十年化風盛播初室成日作偈曰一擊石菴全縱橫
得自然清涼無暑氣消潔有甘泉寬廓含沙界寂寥多絕
衆緣箇中無限意風月一牀眠 勝覽云中隋山在大
隋之後上山三十里至光相閣三月半間掃去積雪下
視葛仙白鹿大隋真培塿也 碑目云九隴縣龍懷寺

碑唐王勃撰略云龍懷山者井絡之所交會岷隅之所
控帶攢峰北走吐香嶂於玄霄巨壑南馳歛洪濤於赤
岸香城寶地左右林泉碧岫丹岑往來煙樹隋開皇五
年始賜額為龍懷寺因嶂為壁憑崖列戶地鄰縣左遂
均縣上之恩山似龍盤即建龍懷之刹矣 按彭州寺
觀特盛故予隨類而詮次之則山川亦可見焉

崇寧縣

唐之唐昌縣宋初之永昌縣也熙寧間狄道李子忠來

牧是邑構堂于其所居之西北隅而命之曰治已修筠
珍榦羅立環擁寒溜滾滾渠行沼畜公事既休即來其
間此文與可記之矣 唐咸通中御史中丞吳行魯出
知彭州於州之唐昌縣心置草市歇馬亭及靈岩報恩
院陳谿為之作記立碑建德鄉其詞曰聖上以南夷不
虔邊塵坐起候旦授執政意俾擇要郡以良能而牧之
遂命御史中丞渤海吳公行魯持節出刺雅安公松筠
植心金石勵志雅安實邊之衝東入嶮隘應援由此公

至止一顧屹如巨防當危疑之秋瞬息無事郡人以考
秩將滿預懷去思接武陳誠願借綏撫丞相隴西公以
公功業昭著飛章上聞請充節度叅謀兼諸軍行營副
都知兵馬使東路行營都知兵馬使仍兼知黎州巡邊
制置公遂於大渡河朔置一橋亘五百尺自干戈未寧
士馬旁午饋運往復商旅經過曾無覆溺之憂永絕滯
留之患至今行者見必歸思異跡奇謀繁難具紀由是
復昇于捷為雅之南千里縣道烽堡相踔早夕軍食跂

俟於捷為公智出事先機生料外風波助意舟楫如飛
是得闔境無虞諸軍飫飽實公之功也由是天子以彭
門名郡而償其重勲公輟車之日即究風俗民之憂苦
已明其重輕事之興廢已熟其利病從便革弊幽顯愜
心郡內既肅施及支邑以唐昌縣中界接導江郫城東
西綿遠不啻兩舍雖有村落僻在荒塘昔置郵亭廢毀
將久行役者野食而泉飲貿易者星往而燭歸疲敝公
行投告無所深溝雨漲古陌橋摧跬步難踰艱苦寧述

况輸役責限徵斂有程而欲罪其稽逋者乎公惻然凝想即日計成遂陳於連帥於縣心置草市因其鄉名便以建德為號自此四來者旋踵而迓迎中望者舉目而知歸老幼攜挈倏忽而至萬家歡笑共事脩營不旬日而告就今則百貨咸集蠢類莫遺旗亭旅舍翼張鱗次榆楊相接桑麻漸繁如此牧人可謂移風易俗矣昔武侯以蜀腴脆故令隣邑翊日而市意在習其筋力而俟之征徭又每及上春以蠶為名因定日而有知所徃公

亦約之以期而候之其日商旅輦貨至者數萬珍纖之
玩悉有受用之具畢陳想人之心豈待詢問而知其歡
悅也復以路由諸部疊跡輪蹄徘徊一息無稅駕之所
遂出俸錢建長亭崇軒邃室外廡內厨帷薄精新器物
充足則往來者非止晝食而卜夜可矣人既繁會俗已
豐饒又置一鎮抽武士三十人而禦之創立廨署早暮
巡警盜將竄跡人遂高眠不感晨鷄無聞夜犬皆云康
泰不可比儔又茲地會昌之前有佛寺數所因廢而未

興鄉間求福無處禮敬像設之儀莫識鐘磬之聲不聞
僻野深郊轉為輦俗復置靈巖報恩院脩北方天王及
侍從奇工妙飾相好無雙高墉環合門廡揭立又度僧
住持行道無有虛日斯人也非只豐足而永逃夭札之
患得不紀其盛跡而垂於無窮者哉

蜀中廣記卷五

欽定四庫全書

蜀中廣記卷六

明 曹學佺 撰

名勝記第六

川西道

成都府六

灌縣

成都記云江水出羊膊山北連甘松至于灌口永康軍

志漢文翁為守穿湔江水堰流以灌平陸春耕之際需之如金號曰金灌口也 李膺益州記曰湔水路西七里灌口山古所謂天彭闕也華陽國志望帝之時會有水災其相開明決玉壘以除水害遂委以政事已而禪位於開明之西山隱焉按今灌口鎮有望帝祠存 道將又云秦李冰為蜀守知天文地理謂汶山為天彭門乃至湔及縣見兩山相對如闕彷彿若有神見遂於水上立祠三所祭用三牲珪璧沉瓚漢興數使使者祭之按揚

雄蜀記李冰以亡者過天彭闕精靈數見焉 元和志
灌口鎮在導江縣西二十六里後魏置自灌口坂迄千
頃山五百里間兩崖壁立有瀑布飛流十里而九昔人
以為井陘之地寰宇記云唐貞觀於灌口鎮立鎮靜軍
宋改為永康軍矣杜甫野望因過常少仙詩野橋齊度
馬秋望轉悠哉竹覆青城合江從灌口來入村樵徑引
嘗果栗園開落盡高天日幽人未遣回岑參聞崔十二
侍御灌口夜宿報恩寺詩聞君尋野寺便宿支公房谿

月冷深殿江雲擁迴廊燃燈松林靜煮茗柴門香勝事
不可接相思幽興長蘇軾送鮮于都曹歸蜀灌口舊居
詩繭盡霜鬢照碧銅依然春雪在長松朝行犀浦催收
竿夜渡繩橋看伏龍莫歎倦游無駟馬要將老健敵千
鍾子雲三世惟身在為向西南說病容 水經註曰江
水又歷都安縣即汶山郡治劉先主所置也有桃關及
漢武帝祠李冰作大堰於此立碑六字曰深淘潭淺包
陂陂者於江作壩壩有左右口謂之湔壩江 古今集

記曰李冰使其子二郎作三石人以鎮湔江五石犀以厭水怪鑿離堆山以避沫水之害穿三十六江灌漑川西南十數州縣稻田自禹治水之後冰能因其舊跡而疏廣之今縣西三十三里犍尾堰索橋有李冰祠按即崇德廟也宋扈仲榮仕為監永康軍崇德廟即此 范石湖離堆詩序云沿江兩厓中斷相傳秦李冰鑿此以分江水上有伏龍觀是水鎖孽龍處蜀漢水涸則遣官致祭壅都江水以自足謂之攝水民祭賽者率以羊歲

殺羊四五萬計其詩云殘山狼石雙虎臥斧跡鱗皴中
鑿破潭澗油油無敢唾下有猛龍拴鐵鎖自從分流注
石門西州秔稻如黃雲剗羊五萬大作社春作伐鼓蒼
烟根我昔官稱勸農使年年來激西江水成都火米不
論錢絲管相隨看蠶市 註水經曰江水由湔壩江入
郫江檢江以行舟益州記曰江至都安堰其右檢其左
其正流遂東郫江之右也因山頽水坐致竹木以溉諸
郡又羊摩江灌江西於玉女房下作三石人於白沙郫

郵在堰官上立水中刻要江神水竭不至足盛不沒腰
是以蜀人旱則藉以為溉雨則不過其流故記曰水旱
從人不知饑饉沃野千里世號陸海謂之天府也俗謂
都安之堰亦曰湔堰又謂之金堤左思蜀都賦云西踰
金堤者也諸葛亮北征以此堰農大國之所資以征丁
千二百人主護之有堰官李膺記云玉女房鑿山為穴
深數十丈有廊廡堂室屈曲殆若神功非人力矣 蜀
志後主登觀坂看汶江旬日始還成都華陽國志益

州刺史皇甫晏至都安屯兵觀坂從事何旅曰今所安
營地名觀坂上反在下其徵不祥不從果為牙門張和
所殺 隄堰志曰粵自神禹導江正源至石紐出汶川
而南其址無水秦昭襄王時蜀守李冰鑿離堆虎頭於
江中設象鼻七十餘丈首濶一丈中濶一十五丈後一
十三丈指水一十二座大小釣魚護岸一百八十餘丈
橫渚洪流故曰都江以分岷江之水址折而東灌漑蜀
郡田疇以億萬計蜀用富饒號稱陸海於所逼處又設

護岸蓋寵石附岸水不蠹土而渠可堅久指水數十餘處如象鼻狀以扞之皆冰之所作也都江口舊有石馬埋灘下凡穿洶必以離堆石記為準號曰水則其下洶深二丈二尺而水則下亦深七八尺石渠水口橫一丈五尺從一百二十丈深六尺石洞水分為三曰灌田水口橫一丈從一百二十丈深六尺曰彭州水口橫三丈又分為二其一從十有五丈深五尺其一從四十丈深三尺曰將軍橋水口橫二丈三尺從四十丈深三尺外

應水口橫四丈從一百四十丈而中分之上流深六尺
下流二尺保堂水口橫一丈五尺從一百三十丈深四
尺倉門水口橫八尺從五十丈深二尺馬騎水口橫六
丈從二百九十丈深二尺鼓墘石趾水口橫二丈五尺
從六十丈深二尺東穴水口橫三尺從一百五丈深五
尺投龍水口橫五丈從八十丈深三尺北水口橫四丈
從一百八十丈深三尺鐵溪水口橫一丈從六十丈深
三尺搏下水口橫五丈從一百二十丈深三尺五徙水

口橫三丈從六十丈深一尺歲以為度過與不足其害
立見由漢以來數千百年或因舊葺治或因時疏築而
功實原於秦守冰故厯代廟祀之所謂馬騎水口者東
南六七里間有堤名上馬騎下馬騎各長二百餘步世
傳冰駐馬於此督工後訛以騎為隄也 宋史曰沫水
出蜀西徼外今陽山江大皂江皆為沫水入西川嘉眉
蜀益間夏潦洋溢必有衝決可畏之患自秦李冰鑿離
堆以分其勢一派南流于成都以合岷江一派由永康

至瀘州以合大江一派入東川而後西川沫水之害減
耕桑之利溥矣皂江支流迤北曰都江口置大堰䟽北
流為三曰外應溉永康之導江成都之新繁而達於懷
安之金堂東北曰三石洞溉導江與彭之九隴崇寧濛
陽而達於漢之雒東南曰馬騎溉導江與彭之崇寧成
都之郫溫新都新繁成都華陽三流而下派別支分不
可悉紀其大者十有四自外應而分曰保堂曰倉門自
三石洞而分曰將軍橋曰灌田曰雒源自馬騎而分曰

石址曰鼓塹曰道溪曰東穴曰投龍曰址曰搏下曰五
徙而石渠之水則自離堆別而東與上下馬騎乾溪合
凡為堰九曰李光^缺膺村曰百丈曰石門曰廣濟曰顏
上曰弱水曰濟曰導皆以隄攝址流注之東而防其決
離堆之南實支流故導以竹籠石為大隄凡七壘如象
鼻狀以捍之離堆之趾舊鑿石為水則則盈一尺至十
而止水及六則流始足用過則從侍郎堰減水河泄而
歸諸江歲作侍郎堰必以竹為繩自址引而南準水則

第四以為高下之度江道既分水復湍暴沙石填委多成灘磧歲暮水落築堤壅水上流春正月役工濬治謂之穿淘有碑刻熙寧制書云凡創水磴碾有妨灌溉民田者以違制論元史曰蜀堰舊為李冰作厯數千百年所過衝崩蕩嚙又大為民患有司以故事歲至隄防一百三十有三所役兵民多者萬餘人少者千人其下充數百人役凡七十日不及七十日雖事治不得休息不役者日出三緡為庸錢由是富者屈於貲貧者屈於

力上下交病會其費歲不下鉅萬緡大抵出於民者什九藏於吏而利之所及不足以償其費元統二年僉四川肅政廉訪司事吉當普巡行周視得要害三十有二處餘悉罷之召灌州判官張宏計曰若斃以石歲役可罷民力可蘇宏遂出私錢為小堰堰成暴漲不動乃具白行省及蒙古軍七翼之長郡縣守宰下及鄉里之老各陳利害咸以為便於是徵工發徒即都江舊蹟而治之鹽井關限其西北水西關據其西南分江導水因勢

渚堰以鐵六千斤鑄大龜貫以鐵柱鎮其江源然後諸
堰皆甃以石範鐵以闌其中以桐油石灰雜麻絲搗熟
密其罅漏岸善崩者築江石以護之上植楊柳旁種蔓
荊櫛比鱗次賴以為固所至或疏舊渠以導其流或鑿
新渠以殺其勢遇水會則有石門泄蓄自是水利省臺
上其功詔揭傒斯記之是役石工金工皆七百人木工
二百五十役徒三千九百蒙古居二千糧千石有奇石
材萬餘灰六萬餘斤油半之鐵六萬五千斤麻五千斤

共四萬九千有奇緡工畢官積餘二十萬一千八百緡
責灌守以貸於民歲取其息以備祭祀淘灘修堰之費
仍免灌之兵民常役俾專力堰事焉 舊經云太初蜀
王征西番野人以壺漿為獻王使投之江中三軍飲之
皆醉因名味江寰宇記云味江水出青城長樂山下江
中有大石高數丈號大坎又有小石在其下亦高數丈
為小坎水激其上洶湧聞于數里古老傳云味江水甘
美人爭飲之因名青城外史云即今漩口江也江口石

有名大險小險或即坎之轉音大坎石磴逶迤其傍深
林老樹猿猴累累掛樹間春夏水至則沒路矣 水
經註云都安縣渡江有笮橋按所謂索橋溜筩皆其遺
制也唐獨孤及笮橋贊曰相引一索人綴其上如猱之
縛轉帖入淵如鳶之落尋橦而上如魚之躍頃刻不戒
賈無底壑志云縣西二里有橋曰珠浦即索橋也其制
兩岸塹石為穴捷石為籠夾植巨木屹砥湍流編竹繩
跨江橫濶一丈離水面五尺長百二十丈方輿勝覽云

繩橋前有翠園山山上道院古王仙柯燒丹之處在永康縣西八里范成大過青城題索橋詩織簾勻鋪面排繩彊架空染人高曬帛獵戶遠張量薄薄難承雨翻翻不受風何時將蜀客東下看垂虹志云溜簫橋在縣西六十里兩岸石柱以竹繩橫牽斲木為簫狀似瓦覆繫繩上渡者以麻繩縛懸簫下仰面緣繩而過南通滋茂鄉與汶川界今易為繩橋古今集記云縣西十餘里有虛閣棧道二十五里有石笋閣道三十里龍洞閣道

碑目云距紫屏山二里許道旁有漢石刻三皆治道記也其一曰建平五年孝哀時刻也其二曰永平元年孝明時刻也在范公平磨崖之西 成都記云古魚鳧國治導江縣寰宇記曰導江縣本都安縣地太康地志云都安劉先主置屬汶山郡周武帝併入益州之郫別於灌口置汶山縣唐武德元年改為盤龍縣尋改為導江李膺記云山土色黃盤迴有龍形故曰盤龍外史云盤龍山不言所在今學宮之右有金龜山壤黃而形蜿蜒

蜒者是也 志云導江廢縣在東二十里導江鋪元為
巡檢司時土城尚在今悉平為田初孟蜀改導江為灌
州宋改永康軍尋廢熙寧七年趙抃知成都乞復永康
軍嘉定二年知軍虞剛簡上五事曰本軍近接威茂并
青城一帶山不五七十里即是夷界唐吐蕃入寇自此
途出又距成都百二十里而近其為緊切甚於雅黎
方輿勝覽云玉壘堂致爽軒俱在軍治范至能詩夕陽
塵外漲郊墟六六峰頭夢夢覺餘竹色喚人來下馬亂蟬

深處有圖書陸務觀和云黃塵赤日汗沾裾竹裏煎茶
喜有餘堪笑放翁窮意巧就君池館讀君書子惇和云
團團竹色遶郊居勾引清風百畝餘憶昔敲門蘇內翰
而今下馬范中書紀勝云廣莫亭在軍北朝天門太
守呂汲公建李壁記曰危簷飛檻負城四出觀覽之勝
甲于東南出金馬門過朝天寺登廣莫亭憑欄下視一
目千里矣又有花洲在軍城南百步王子俊為賦魏華
父記碑目云唐貞觀十三年韋作觀魚碑在軍城五

里北山朝天寺又云唐人徐浩書金剛經在導江天宮
院今刻之石又云導江縣北迎祥寺鐘樓內有刻字不
記年月觀其有節度押衙字即為唐末五代間刻也寺
有老泉為記東坡書碑刻俱存 志云縣西二里崇德
廟李文饒鎮蜀時重建段全暉為記廟內有八分書聖
水池碣近年掘地得之移入成都墨池按方輿勝覽聖
水池在永康縣西一舍妙真觀觀昔有女子上昇仙洞
藥爐尚存不知碣何以在崇德廟 碑目云唐吳行魯

碑在導江縣北關雞臺有古碑刻字畫磨滅蓋唐大中十一年治隸彭州時吳為長史所建又云偽蜀王建之子嘉王宗壽與能仁院僧印往來書劄二十餘簡存于龍門院墨迹宛然如新按張商英龍門院本末記院在永康縣六里青城大面三十六峰嵯峨萬仞盡在軒檻間其詩云四時積雪瞻岷嶺三派飛泉出洞天即此地寰宇記云司馬相如墓在導江縣東十里又有楊妃池今為唐氏之居按太真外傳楊元琰為蜀州司戶生

貴妃於此妃兒時嘗誤墮此池志云在縣東二十里今
為邱洪二姓宅 陳後山云王蜀花蕊夫人姓費氏青
城人也圖經相傳有花蕊舊宅不知其處費氏尚有裔
存詳見詩話 方輿勝覽云蠶崖關在導江縣五十里
以振西山之走集外史云關去縣二十里實汶川地有
巨石高丈餘峙山之麓土人云此蠶崖石也關以此得
名志云關當縣西岷江之北松茂驛路之衝周武天和
二年初立石路巉稜如簇蠶因名杜少陵詩蠶叢鐵馬

瘦灌口米船稀即此宋熙寧五年重建元末燬于兵火
今置巡司關外有市謂之蠶崖市宋史韓忠憲公子紺
繼知成都日所遷以為夏夷互易之地蓋絕西羌窺伺
之端云金部格曰勅松當悉維翼等州熟羌每年十月
已後即來彭州互市法司差上佐一人於蠶崖關外依
市法至市場交易勿令百姓與往還 志云玉壘山去
縣三百里衆峰叢擁遠望無形惟雲表崔嵬稍露山石
瑩潔可為器亦砮砮之類唐貞觀初闢於其下名玉壘

關亦曰七盤關乃番夷往來之衝也 碑目云玉壘關

碑唐大中十年白敏中帥蜀日建關旁有大碑即幕府
陳可度頌功德之碑岑參酬崔十三侍御登玉壘山思
故園見寄詩玉壘天晴望諸峰盡覺低故園江樹北斜
日嶺雲西曠野看人小長空共鳥齊高山徒仰止不得
日攀躋崔信明送金敬陵入蜀詩金門去蜀道玉壘望
長安豈言千里足方尋九折難西上君飛蓋東歸我挂
冠猿聲出峽斷月影落江寒從今與君別花月幾新殘

李膺益州記云齊永明初置齊基縣於青城山東築土城週五里周地圖記云武帝改齊基為青城縣因山名也志云廢青城在今縣西四十里散入大樂其亭二鄉 名山記曰益州西南青城山一名青城都山形似城其上有崖舍赤壁張天師所治處南連峨眉亦有洞天諸靈書所藏不知當是第幾洞天也 玉匱經曰青城山為第五大洞寶仙九室之天一名赤城山對蜀郡之西北在岷山之南杜光庭記云岷山連峰接岫千里

不絕青城乃其第一峰耳高三千六百丈周匝五千里
霸仙所宅祥異則多於是有瑤林瓊樹金沙玉田甘露
芝草天池醴泉之異焉福地記中國名山以青城峨眉
為西嶽佐理又三佐命山及十大洞天皆有青城之名
楊用修蜀志補鐫云青城山有一百八景風日佳時
登儲福宮望之歷歷可數曰彭祖峰曰石鑑峰曰龍牙
峰曰野雲溪曰藏雲塢曰赤雲榭曰垂虹亭曰捎雲閣
曰觸石軒曰臥雲庵曰青溪曰碧桃溪曰芙蓉溪曰躡

蜀溪曰海棠溪曰溪光亭曰過溪橋曰乳泉曰滴珠泉
曰檻泉曰清風湖曰鑑湖曰荻花洲曰蓼嶼曰碧霞洞
曰斜川曰曲水曰紫霞洞曰鑑橋曰藥園曰紫薇洞曰
醑醑洞曰清陰橋曰綠篠橋曰玉微亭曰紅霞塢曰爛
柯亭曰灌稻泉曰翠光亭曰茅堂曰紫陽洞曰桃源曰
暗香亭曰金華堂曰舸齋曰蕙谷曰黃梅嶺曰煎茶溪
曰芹浦曰鸚鵡林曰葦廬曰野人澗曰柘坪曰寶遂社
曰妙高峰曰安羅坪曰木蘭岫曰桂香亭曰石寶曰白

蘋洲曰藻壑曰望岷岷曰豹谷曰百花潭曰鹿闌曰瑞
香巖曰芝畦曰瑞荷塘曰兼葭渚曰黃浦曰菱灣曰芭
蕉谷曰直釣亭曰和芳隴曰金根徑曰橘徑曰鑑雉泓
曰芙蓉島曰歲寒洞曰葦杭曰棲真洞曰望仙坡曰黃
葵坡曰鳳簫樓曰跨鳳亭曰牛關曰馭鶴峰曰化城洞
曰望闕臺曰凝碧溪曰玉女潭曰寶陀岩曰萼坡曰藏
春島曰桂子谷曰九曲池曰華海曰江梅島曰水仙匯
曰蒼筤崗曰丹臺曰浴丹池曰曝藥臺曰芳草渡曰采

薇汀曰金絲堤曰菖蒲谷曰種茶岩凡一百有八也

唐耿漳送崔明府赴青城縣詩清冬賓御出蜀道翠微
間遠霧開羣壑初陽照近關霜潭浮紫菜雪棧繞青山
當似遺民去柴桑政自閒錢起賦得青城山送楊杜二
郎中赴蜀軍歌蜀山西南千萬重仙經最說青城峰青城
巖峯倚空碧遠壓峨眉吞劍壁錦屏雲起易成霞玉洞
花明不知夕星臺二妙逐王師阮瑤軍書王粲詩日落
猿聲連玉笛晴來山翠傍旌旗綠蘿春月營門近知君

對酒遙相思岑參寄青城龍谿真道人詩五嶽之丈人
西望青瞢瞢雲開露崖崙百里見石稜龍谿盤中峰上
有蓮花僧絕頂小蘭若四時嵐氣凝身同雲虛無心與
谿清澄誦戒龍每聽賦詩人則稱杉風吹袈裟石壁懸
孤燈久欲謝微祿誓將歸大乘願聞開士說庶以心相
應崔塗寄青城山顥禪師詩懷師不可攀師住杳冥間
林下誰聞法塵中只見山終年人不到晝日鳥空還曾
聽無生說應憐獨未聞賈島送靈應上人詩遍叅尊宿

遊方久名嶽奇峰問此公五月半間看瀑布青城山裏
白雲中宋紫微孫處士送青城丈人詩深羨青城好洞天
白龍一覺幾千年鋪雲枕石長松下朝退看書盡日眠
趙抃入蜀先寄青城張遨先生詩踰年青社得徘徊一
日皇華下詔催蜀道五千馳驛去秦關百二拂雲開不
同叅政初時入也似尚書兩度來到日先生應笑我白
頭猶自走塵埃又遊青城詩三十六峰峻維岷在蜀奇
方行刺史部重欵丈人祠凍雪諸蕃隔晴雲大面披訪

仙窮寶洞勅鬼覘豐碑泉落寒崖響蘿依古木垂良
工存舊筆老叟琢新詩陟險齊雙屐逢幽鼓七絲盤
桓不忍去還作更來期范成大青城山詩萬里清遊
不暇慵雙旌換得一枝筇來從井絡直西路上到江
源第一峰海內閒身輸我佚山中佳氣為人濃題詩
試刻巖前石付與他年薜蘿重李膺記云入山七
里至赤石城有羊馬臺三師壇上五里至瀑布水澗
二百步有二石梯有一石笋高三丈過二石門絕崖

數百丈下起常道觀高峰下有水六時灑落東北有二石室名龍宮可容百餘人從龍宮過石室至石梯名龍橋又有一石梯洞穴深邃莫知所極西北有石室宛然見存又有黃帝壇石法天上圓下方濶一丈二尺有十二角觀東石刻日月各濶五尺厚一尺二寸相對柱上烏兔輝燦方圓磅礴可觀 五岳真形圖云洞天所在之處其下別有日月分精以照其中龍橋處二山相去百餘步峯巒危竦相對橋在峰首橋之半漸漸促小

可六七寸長一丈五尺兩邊懸崖俯臨不測山旁有誓
石天師張道陵與鬼兵為誓朱筆畫山青崖中絕今驗
斷處石並丹色濶二十丈深六七丈望之絕然也青
城甲記黃帝封青城山為五嶽丈人乃嶽瀆之上司真
仙之崇秩一月之內羣嶽再朝焉續博物志青城縣歲
春秋以蔬饌享丈人山令躬行禮蓋蜀之望山也有丈
人觀在青城北二十里碑目云丈人觀四碑大殿右功
德碑鄭敎書殿上祝文碣進士任璠文三門下置觀碑

徐大亨文三門右紀符瑞碣甘遺榮八分書杜甫詩云
自為青城客不唾青城地為愛丈人山丹梯近幽意丈
人祠西佳氣濃綠雲擬住最高峰掃除白髮黃精在君
看他時冰雪容李真六言詩春凍曉鶯露重夜寒幽枕
雲生豈是與山無素丈人著帽相迎真蓋唐末仙人也
陸游謁丈人觀詩黃金篆書榜朱門夾道巨竹屯蒼雲
岩巔劃若天地分千柱眈眈壓其根纓冠笑謁丈人君
廣殿空庭吹寶薰摩挲畫牆手為斂異哉山夔與

土蹟物怪齧齧冠邱墳僊人佩玉雜悅盼手整貂冠最
不羣欲去不忍恨日曛道翁採藥晝夜勤松根茯苓獲
兼斤人芝植立強骨筋枸杞羣吠聲狺狺山爐小甑炊
幽芬朱顏不飲常自醺我亦宿誦五千文一念之差墮
世紛逝將從翁走如麋隱書秘訣何由聞又題丈人觀
道院詩斷雲浮月磬聲殘木影如龍布石盤偶駕青鸞
塵世窄閒吹玉笛洞天寒竒香滿院晨炊藥異氣穿巖
夜浴丹却笑飛仙未忘俗金貂猶帶侍中冠按務觀二

作多詠范長生事其劍南詩稿云青城山有孫太古畫
碧落侍中范長生舉手整貂蟬像特妙其詩又有浮世
深沉何足計丹成碧落珥貂蟬之句方輿勝覽云碧
落觀即長生觀在青城山北二十里昔有范寂字無爲
劉先主時棲止青城山中以修煉為事先主徵之不起
就封為逍遙公得長生久視之道劉禪易其宅為長生
觀觀有古栴高數十尋圍三十尺世傳長生手植胡叔
豹詩更斲盤根藏大藥也今嘉樹得長生即此觀有赤

城閣臨眺甚遠外史云唐明皇登青城於長生觀駐輦
故志謂長生是玄宗別殿雖就傾圯遺砌儼然唐求長
生觀詩數里緣山不厭難為尋真訣問黃冠苔鋪翠點
仙橋滑松織香梢古道寒晝傍綠畦嫋嫩玉夜開紅竈
燃新丹鍾聲已斷泉聲在風動茅花月滿壇 乙記云
上清宮上皇殿延慶宮皆明皇幸蜀時造吳船錄云上
清宮在最高峰之頂以板閣挿石作堂殿下視丈人峰
直墻堵耳岷山數百峰悉在欄檻下如翠浪起伏勢皆

東傾孫知微詩臺殿壓平青嶂頂松杉插破白雲根者
此也勝覽云晉朝起天宮於高臺山丈人祠側號曰上
清宮其東北麓即天師種粟之處上有天池夜則神燈
飛行遍空或謂草木之精所為王叔瞻詩神燈點點光
可燭星斗熒熒低欲捫即此宮庭又出瑞聖花見方物
記晉時又於丈人峰前建上皇觀蜀志補罇云亦名
玄真觀神芝異草嘉樹名花皆生於此芝草如稻苗食
之可仙唐章孝標上皇觀詩烟霞華蓋七星壇想像先

朝駐禁鑾輦路已平栽藥地皇風猶在步虛壇樓臺屢
氣晴蕭索杉檜龍身老屈蟠翻感惠休并李郭劍門空
處望長安 延慶宮即常道觀也勝覽云自會慶宮西
行一二里有常道觀乃古黃帝祠址隋建甲記云大業
七年太常博士陰道碑在常道觀軒轅石龕下軒轅臺
獨秀霞表下望衆山若蟻垤連抱之樹若薺志云石龕
今呼天師洞有張天師像及唐碑字畫完好可搨碑文
曰勅益州長史張敬忠頃者西南阻化徭役殷繁山川

既接於夷戎縣道有勞於轉輸自卿鎮撫百姓咸安草
弊遷訛良多慰沃歲陰寒極比安好今賜卿衣一副至
領之蜀州青城先有常道觀其觀所置元在青城山中
聞有飛赴寺僧奪以為寺州既在卿節度檢校勿令相
侵觀還道家寺依山外舊所使道俗兩所各有區分今
使內品官王懷景道士王仙卿往蜀川等州故此遣書
指不多及右勅明皇行書開元十二年歲次甲子閏十
二月十五日下午十三年正月一日至益州二日至蜀州

專檢校移寺官節度使判官彭州司倉參軍楊壽蜀州
刺史平嗣先青城縣令沈從簡常道觀主白遺榮勒字
右款八分書碑目云延慶移觀手詔碑在觀後絕峰之
上石龕中韓擇木八分書記銘在延慶靈寶真人五符
神幢下開元十二年立志云延慶觀亦名昭慶文與可
昭慶觀詩琳崖盤玉霄彩翠接步武雲霞不可畫泉石
固難誇神幢逾百尋帝轍歷萬古靈湫誰與窮長飛六
時雨所謂神幢即五符幢也 碑目唐玄宗真容碑在

六時岩下按志明皇像亦在天師洞或以為孟景像也
錄異記云六時水在宗玄觀南二里對觀有峭崖高五
百餘尺崖上授道壇昔真君與軒轅帝傳道之所每
日六時有自然水從崖上灑入澗底有石龕刻玄宗皇
帝御容勝覽云常道觀南有六時水云六時灑水以代
香漏陰時即飄然而灑陽時則無呂汲公詩巖輝萬古
照泉漏六時飛京鐘詩八千里隔東西境十二時分晝
夜泉即此又有石日月日在延慶觀東北月在溪西崖

中並徑五尺六寸半一曰石天地天形有十二角地形
正方濶六七尺或云即誓鬼壇也方輿云鬼城山在
丈人觀西北又云常道觀北有張天師誓鬼壇志云漢
時龍穴出水暴害禾稼張道陵立石臺以鎮之名誓鬼
臺甲記曰壬子七月十三日鬼城山崩瀑水大至山高
百餘丈丈人觀居其下將憂摧壞俄有大石墜下堰水
向東竟免漂溺初觀中資溪水日用負汲為勞自瀑水
之後流泉直注厨下甘美不竭碑目云昔天師自鬼城

山駭鬼於絕域有鬼界古碑字畫磨滅不知年代又云
天師戒鬼筆迹在大龍橋側深一十三丈濶十三丈

輿地紀勝云清都觀在延慶上二三里一名洞天觀唐
道士薛昌浴丹井杜光庭墓俱在觀後薛昌即飲昌陸
酒得道者文潞公鎮蜀日市觀側隙地以贈張俞所謂
白雲隱居也其下白雲溪出焉任宗易詩懶隨六詔上
丹闕高臥一峰藏白雲少愚自題云欲作外臣誰是友
白雲孤鶴在岩扉杜廣成曰延慶觀南天倉山神仙

以為帑庫有三十六峰前十八曰陽峰後十八曰陰峰
河圖括地象白沙一百八景青城三十六峰謂此也晁
公遡詩天峰夜半剪冰花三十六峰如玉立趙雄詩三
十六峰如不到青城還似不曾遊勝覽云天倉下儲
福宮有唐睿宗女玉真公主像宮有天峰閣望三十六
峰如列屏沈少南詩割盡齊封奉魯元更開泌水占名
園何如帝子空山外落日騎驢芳草原胡叔豹詩弃形
如遺但養神阿兄爛醉梨園春人百撼之耳不聞何物

女子乃獨醒徑來空山卧白雲不見漁陽胡馬塵文同
天倉山威儀觀詩羣峰削瓊瑤老蘚抹古綠應朝大岷
去簪笏儼相逐珠宮秘仙仗錦笈藏寶籙上帝此為倉
其田堪種玉 蜀禱机咸康元年九月王衍與其母太
后太妃同禱青城宮人畢從皆衣雲霞之衣衍自製甘
州詞令宮人歌之佳山中旬日設醮祈福太后太妃又
謁王先生鑄像已幸丈人玄都二觀及金華宮夫人李
舜絃隨駕詩曰因隨八馬上仙山頓隔埃塵物象間只

恐西追王母宴却憂難得到人間 志云金華在丹景

玉華在青城陸游青城山夜登玉華樓木蘭花慢詞云
閨邯鄲夢境歎綠髮早霜侵奈華岳燒丹青谿看鶴尚
負初心年來向濁世裏悟真詮秘訣絕幽深養就金芝
九畹種成琪樹千林星壇夜學步虛吟露冷透瑤簪對
翠鳳披雲青鸞溯月宮闕蕭森琅函一封奏罷自鈞天
帝所有知音却過蓬壺笑傲世間歲月駸駸 乙記云
青城有天國寺玉置經云青城一名青城都一名天谷

山谷音近國即天國也方輿勝覽天國山在永康縣左連大面右連鶴鳴前臨獅子後枕大隋上有龍池及融照寺按即天國寺也云是黃帝築壇封甯封處未詳唐真人張令問隱居於此號天國山人以詩寄杜光庭曰試問朝中為宰相何如林下作神仙一壺美酒一爐藥飽聽松風清晝眠山有玉女洞亦曰素女碑目隋刺史薛道衡磨崖碑在玉女洞後矣五嶽圖曰青城山七十二小洞應七十二侯八大洞應八節玉女其一也玄中

記曰青城洞穴分三孔西北通崑崙外史言有李氏好
道嘗率丁夫持炬賣糧入山下古洞行三日至一大溪
不得涉而止比出洞口石自合迷不知處 寰宇記云
聖母山高二千餘丈週三十餘里其南有深洞在八大
洞之數傍便山高下與青城相接當吐蕃之界谿谷深
邃夏積冰雪所以限夷夏也大面山在三溪北杜光庭
曰前號青城後曰大面其實一耳 按此溪水色黑又
名黑水溪雲笈七籤隋褚聖母黑水溪人悟達國師題

其居為聖母院山亦從而名之宋時山中有二隱士一曰譙先生定字天授建炎初召至揚州留入講筵不可拜通直郎致仕百三十餘歲猶存巢徑險絕人不能到先生數年輒一出山前人亦罕有見之者一日姚太尉平仲字希晏靖康初在圍城中夜率將士攻賊營不利騎駿驢逸去建炎初所在揭榜以觀察使召之不出淳熙間有于丈人觀道院見之年近九十紫鬚長委地蓋皆徑道於山中也錄異記青城縣西址二里有老君觀

門東上有一泉號馬跑泉水味甘美四時不絕春夏如
冰秋冬反溫昔老君與天真皇人會真之所其泉是老
君所乘馬跑成即冲妙觀也碑目冲妙觀記杜光庭撰
勝覽云飛赴寺在青城縣飛赴山下舊名昌聖院乃
唐左軍容使嚴君美捨宅有四望亭呂汲公詩最勝西
峰下林梢四望亭江山觀掌握梁益布丹青文陵州詩
平林露層巘上獨置孤寺羣仙馭飛駕往往赴於此風
光幡影亂日落鐘聲起誰可謂詩豪與來吟萬紙 志

云香積山寺即靈岩寺也有瀑布及鷄骨禪師塔即周地圖之通靈山寺又云今縣東南四十里承天寺有馬祖靈骨塔高丈六尺俗呼為馬祖寺有碑云大厯間靜照頭陀建雲峰道場至宋宣和奪以予黃冠者於是師之靈谷與塔俱遷建炎三年復還舊物建塔於故址栴生石合識記冥符馬紹興元年立石 碑目云青城寶幢院記元和十四年立觀音院記乾符二年立改海晏寺記中和二年立俱在海晏殿中 艾子云蜀青城山

老人村有五世孫者道極險遠生不識鹽醢而溪中枸
杞根如龍蛇飲其水故壽近歲道漸通漸能致五味而
壽亦益衰方輿勝覽老人村在大面山之北昔人避難
其中多享年壽故名或云潛夫張不羣入山採藥浹旬
不返見一叟致敬而問荅曰本丞相范賢之裔知李雄
之祚不永挈吾輩居此為終焉之計圖經云即老澤也
在青城北百三十里昔諸葛亮遷羣獠於山下故名

碑目云獠澤水石記在路次石門崖壁上吳行魯大中

七年奉使巡邊行所鐫按志獠澤闕在縣西南百里乃
董卜胡通華捷徑也 古今記云老人村有牡丹坪王
溉序謂牡丹高數十丈花開盈一尺范至能詩十丈牡
丹如錦蓋人間姚魏敢爭春即此方輿勝覽云牡丹坪
者自青城之長平山捫蘿而上歷鳥道三十里許有平
阜數十畝高樹蔽天春深先花後葉狀如芙蓉香類牡
丹譙定天授季浩太素二先生隱其中云

蜀中廣記卷六

欽定四庫全書

史部

蜀中廣記卷八

詳校官編修臣魏

編修臣程嘉謨覆勘

總校官庶吉士臣何思鈞

校對官學士臣陳本

勝錄舉人臣羅允文

欽定四庫全書

蜀中廣記卷七

明 曹學佺 撰

名勝記第七

川西道

成都府

崇慶州

王勃送杜少府之任蜀州詩城隅輔三秦風煙望五津

與君難別意同是宦遊人海内存知己天涯若比鄰無
為在歧路兒女共霑巾宋之間送趙少府之蜀州詩餞
子西南望烟綿劍道微橋寒金雁落林曙碧鷄飛職拜
與方遠仙成履會歸定知和氏璧遙掩玉輪輝崇慶在
唐程夢龍也 碑目云天章雲篆碑在蜀州唐開元壽
王清書又云蜀州刺史廳壁記大厯年間作以張柬之
鍾紹京李峴王縉四公皆牧是州故有四相堂唐詩紀
事云貞元十四年皇甫澈刺蜀州時賦四相詩序云居

相位者前後四公謨明弼諧遷轉歷比顧已無取忝跡
於斯景行遺烈嗟歎不足也謹述其行事詠其休美庶
將來君子知聖朝之德云爾 本志云州治判官廨後
池即卷畫池趙抃有蜀倅楊瑜邀遊卷畫池詩占勝芳
菲地標名卷畫池水光菱在鑑岸色錦舒帷風碎花千
動烟團柳四垂巧才吟不盡精筆寫徒為照影搖歌榭
分香上酒卮主人邀客賞和氣與春期 勝覽云文潞
公祠在判官廳蓋公之父在天禧時來作判官令公受

業於晉原大夫張錫之客任君後為立祠 紀勝云西湖在郡圃蓋皂江之水皆導城中環守之居因瀦其餘以為湖也范成大吳船錄云蜀州郡圃內西湖極廣袤荷花正盛覓湖船泛之繫纜修竹古木間景物甚野游宴繁盛為西州勝處陸游劍南詩藁云蜀人謂唐安有三千官柳四十琵琶故詩云歸心日夜逆江流官柳三千憶蜀州致能詩云閒隨渠水來偶到湖光裏仍呼水月舟徑度雲錦地誰云不解飲我已荷香醉湖陰玉娟

蟬曼立紅粧外何須東閣梅悠然自興思驚風入午暑
水竹有秋意采菱不盈掬興與葦鱸會遙知新津宿魂
夢亦清麗 碑目云范公鎮留題在府城之太平院范
遊岷山過此題紀院之經閣上云熙寧八年三月遊青
城間四日趨峨眉俱過此與百世相見百朋百嘉侍行
蜀郡公記 志云西南附郭龍門街是晉原縣治寰宇
記云白馬江自晉原縣入新津縣界即杜甫詩白馬江
寒樹影稀者 碑目云蜀先主碑在晉原縣西南二里

唐房琯文又云唐開元碑天寶八年立在晉原常清觀
鮮于仲通文周地圖記云晉原西五十六里墓頤山
上有鹿市百步平坦諸山之鹿日一聚於此寰宇記
云鶴鳴山在晉原縣西八十里絕壁千尋李膺益州記張
道陵登仙之所嘗有白鶴遊其上北與邛州交界又云
臨邛故城俗名公孫述城益州記云蓋李雄據蜀李壽
從牂柯引獠入蜀境自象山以北盡為獠居臨邛舊縣
因茲置也志云蜀州有東亭杜甫和裴迪登蜀州東

亭送客逢早梅相憶見寄詩東閣官梅動詩興還如何
遜在揚州此時對雪遙相憶送客逢春可自由幸不折
來傷歲暮若為看去亂鄉愁江邊一樹垂垂發朝夕催
人自白頭志云東三十里江原鎮即漢江原縣治華
陽國志江原縣郡西渡大江濱文井江水經云文井江
亦李冰所導井上有守捉三十里上有天馬祠李膺益
州記寧州有馬元河河邊牧馬產駿駒一日千里至此
斃乏岸南人為立祠於此水經註小亭山有天馬塚是

也 寰宇記云鄱江出楚金一名皂里水自永康軍青城縣百丈水南流入江源界志云皂江逕江原至新津入河昔張道陵投墨于江其水盡黑故名皂江有北橋杜甫詩云望極春城上開筵近鳥巢白花簷外孕青柳檻前梢池水觀為政厨烟覺遠庖西川供望眼唯有此江郊 勝覽云杜工部祠在江原縣邑宰趙抃建昔杜甫依高適寓於此 寰宇記云公孫述女塚在江原縣東一十三里高三丈周迴二十步故老傳云此冢銅作

絞絡五里故亂離發掘莫之陷也 碑目云唐李百藥
碑在江原縣之萬歲寺唐樊知遷碑在江原縣淨居寺
顏師古文今俱殘缺又云唐太平公主出家勅在天慶
觀按魏了翁江原縣天慶觀雲層臺記略云開禧三年
春蜀盜未平江原道士呂元素語其徒曰吾儕小人羣
居族食無益縣官今逆氛若此又不能剗刃賊腹膏首
原野盍姑杜門以需底定乃相與校藏書見其書有為
九層之臺可以為民襁沴祝釐者則用其法而封之名

以雲臺列天地日月星辰岳瀆之象而禱祠焉宋皇
祐間趙閱道為江原令其二弟揚抗與俱有引流聯句
序云江源縣江繚治廨址而東距三百步瀧湍馳激朝
暮鳴在耳使人聽愛弗倦遂市渠通民田來園亭堦廡
間環迴遶旋溝行沼渟起居觀遊清快心目公暇事休與
弟揚抗坐東軒怡然盤桓共為詩章云別派從江根邀
流入農畝淙淙來源深漣漣度溝淺園穿蕭艾芟塹斷
荆芝剪疏功決晨流溉利千步遠田觀疑澤潄坎聽類

飢建北溟歸鑿池幽岳漾裝巘瀉堺穀微駛迴瀝珠細
轉過寶石眼窺經虛吐口吮流行值落葉浸長浮生蘚
孤鶴眼怪覘纖魚鬣跳展申沉無穢淤底靜有紋塤映
葦色莫分喧琴韻難辨增霖夕闇蛙涵月夜驚犬侵篴
鞭起萌逼水抵垂茵憐黃澆菊籬惜紫沃蘭畹吏治密
甓甃童戲芒車卷灌攜合手勞漱掬致腰俛庭秋臨加
涼軒夏向消烜我矜近濟能僮賀遙沒免貯肥理巨甌
歸厨架修覓供淘飯盃糧給澳羹鼎臠調藥修舊餌剪

茶試蘿薜坐客頻泛觴蹲兒屢洗硯聆寒心脫煩挹冷
酒除面間眺筇步隨靜看髭吟撫高懷造文據清興團
詩遣瑰章非俗成怪句自幽選湧詞波翻瀛綿意緒抽
璽書丹字隸行款碣石磨琬題為引流篇記耳非自銜

新津縣

張天覺以古三墳書得於縣北陽民家墳皆古文傳乃
隸書天覺新津人 范成大新津道中詩雨後郊原淨
村村各好音宿雲浮竹色清溜走楹陰曲沼擎青蓋新

畦藝綠針江天空濶處不受暑光侵予以萬厯庚戌過
此詩云結束為津口分明作秀顏雪峰俱映水天社舊
名山客自荆吳外民其邛蜀間昔賢有佳句磊落動人
寰壬子歲再過此詩云風日何淒緊予行在仲冬平林
烟已盡近郭渡猶重古市沙中火僧樓水際鐘東西雖
不辨彷彿認前峰蓋指修覺山也志云南一里修覺
山神秀禪師結廬於此唐明皇駐蹕為題修覺山三字
寺有左右二井春夏汲東秋冬汲西水則甘冽反之則

否名曰林泉殆靈泉云其下為三江渡因岷江皂水白
馬三江並列而名其上為寶華山橫跨江表俯瞰平川
取物華天寶之義也峰頂多雪又曰雪峰杜甫新津寺
寄王侍郎詩何限倚山木吟詩秋葉黃蟬聲集古寺鳥
影度寒塘風物悲遊子登臨憶侍郎老夫貪佛日隨意
宿僧房又遊修覺寺詩野寺江天豁山扉花竹幽詩應
有神助吾得及春遊徑石相縈帶川雲自去留禪枝宿
衆鳥漂轉暮歸愁又寺憶曾遊處橋憐再渡時江山如

有待花柳更無私野潤烟光薄沙暄日色遲客愁全為
減捨此復何之 志又云南二里西安寺亦神秀初杜
甫暮登西安寺鐘樓寄裴十詩暮倚高樓對雪峰僧來
不語自鳴鐘孤城返照紅將斂近市浮烟翠且重多病
獨愁常閑寂故人相見未從容知君苦思緣詩瘦太白
文遊萬事慵 碑目云唐開元皇帝送趙仙甫尊師歸
蜀詩碑見在新津縣寶真觀 志云南二里平岡治下
第八治也上應參宿蜀人李阿瞿君於此學道有杜天

師詩 勝覽云投龍觀在新津縣南六里枕夜郎溪及
白木水上有龍穴祈禱皆應 又云稠稷山在新津南
八里有草名稠稷服之長生不死上有丹竈古碑宮明
天池軒轅帝於此得仙中第四稠稷治也上應危宿

予友竟陵鍾伯敬遊修覺山記云辛亥十月十有九日

早發新津叔弟恬不知隔江者為何許山也與童騎疾
過之予與艾子後坐舟中指江干削壁千仞竹樹橫
出沒晴嵐雪浪外者異焉問之則修覺山子美游修

傳寺詩云皇寺大書修覺山三大字嵌石壁今猶存
者即其處也沿策登焉所從徑哀山石之複者為磴亂
登狂立各言其理登者屢憩憩處每平平處每當竹樹
濃陰處必從其下左方見江江錯磧渚或圓或半或漸
或返去望心目皆土人縛竹為亂若童子置葉盎中以
度物故其處危之從上視下輕且駛甚適也度磴
六七百三三之一行住坐立更端者數矣其傍乃有石
穴重巖連延盤旋者往修覺寺道也曰姑舍是尋中徑

蘇祠二王二真祠杜工部李供奉蘇端明方正學方
六石之墓子孫墓後數武為寶華寺禮佛畢反自亭出
一三三行所經統敵夾砌數折即修覺寺寺前雙井一
井上一路唐初之明皇書嵌佛殿左側巖壁上字方廣
三四尺一字各真一石飛翥沈著且甚完好予入蜀所
見唐碑獨上王出寺無所見欲返寺僧指石隙一小徑
力索足出與徑乃有平田大陸復緣磴數折上轟然頽
江者曰雪公兩寺乃在其下始悟所云磴去頂四五之

一者第可指修覺耳非此峰也左眺稠稷山如旅行而稍居其傍下憑欄視江則已正無所不見不若初所見江之從其下左方也然從下上修覺去江稍遠從修覺上雪峰視江乃反近舟中所指江干削壁者即着脚處也降自雪峰復遠井塔下屈曲一二里許不復見所由寶華寺徑矣乃忽得所謂石級齒齒壁間往修覺寺道者則今還道也與初所從徑合徑窮登輿是日抵彭山宿

茂州

史記曰南越破後冉駹等皆震恐請臣置吏武帝元鼎六年以冉駹為汶山郡守華陽國志汶山郡有六夷羌胡羗虜白蘭蜺九種之戎牛馬旄氈斑罽青犢髦毼羊羖之屬特多雜藥名香土地剛鹵不宜五穀惟種菽麥而多冰寒盛夏凝凍不釋故夷人冬則避寒入蜀傭賃自食夏則避暑反落歲以為常蜀人謂之作五百石子也禹貢岷山導江註曰江水出蜀西南徼外東至岷

山而禹導之郡縣志岷山在茂州西北最後峯曰列雩
村村有岷山名曰鐵豹一曰羊膊則分水之上源也一
自西南入大渡河一自正南入溢村經石紐過汶川水
經曰岷山在蜀郡氐道縣大江所出東南過其縣北又
曰江水自天彭關東逕汶關而歷氐道縣北註云岷山即
瀆山也水曰瀆水矣又謂之汶阜天彭關亦謂之天谷
也秦昭王以李冰為蜀守冰見氐道縣有天彭山兩山
相對其形如闕謂之天彭門亦曰天彭關江水自此已

上至微弱荀卿曰江出於岷山其始出山也其源可以
濫觴焉益州記曰大江泉源始發羊膊嶺下緣崖散漫
小大百數殆未濫觴東南下百餘里至白馬嶺又自白
馬嶺廻行十餘里至龍涸又八十里至西陵縣又西北
二十里至汶山故郡乃廣二百餘步又西南百八十里
至濕坂江稍大矣河圖括地象曰岷山之精上為井
絡帝以會昌神以建福古蜀謠云汶阜之山江出其腹
帝以會昌神以建福郭璞岷山贊曰岷山之精上絡東

其始出一勺終至縣漢作紀南夏天清地寧漢書注岷
山一名岷家一名沃焦在隴山南首故稱隴蜀山直上
六十里括地志云中國山川東北流其維首在隴蜀正
東曰岷江發源岷山東北流入渤海水經注漢延平中
岷山為壅江不三日不流揚雄自岷山投賦江流以弔
遂名曰反壅也王羲之與周益州書云想足下鎮彼
土亦有為理每欲及卿在彼登汶嶺峨眉而還實不朽
之玉可人無窮要書云周益州書述蜀山川如岷山夏

余嘗讀之於崑崙之伯仲也 山海經云岷山神
焉其木多梓漆其蟲用漆則風雨可致焉郡國志岷
山俗謂之無名山陵陽李新詩在昔岷峨神龍文而馬
君臨之於之也 華陽國志宣帝地節元年武都白
馬生及後漢永平定之因慰勞汶山吏及百姓詣武自
詣 武至度更至重邊人貧苦無以供給求省郡郡
建以永初十五年武以狀上遂省汶山郡復置都尉
府 唐書地理志記云貞觀初置羈縻州九曰維翼徼

塗炎徹向冉穹維州今威州翼州今疊溪所徠以下則
皆白狗羗矣其時一州所領不過數十里而已 寰宇
記云梁普通年於此置繩州取挑閘之路以繩為橋也
繩橋之法先立兩木於水中為橋柱架梁於上以竹為
絙乃密布竹絙於梁繫於兩岸或以大竹落盛石繫繩
於上又以竹縵布於繩夾岸以木為機繩緩則轉機收
之智猛法師所謂冰崖皓然百千餘仞飛絙為橋乘虛
而過窺不見底仰不見天寒氣慘酷影戰魂慄是也又

有度索尋橦之橋大江水峻極如箭兩山之脇繫索為
橋中剡木為橦拴繫行人於上以手自緣索到彼岸則
旁有人為解其系尤極危險陸游詩度索臨千仞梯山
躡半空即此方輿云相公嶺亦名茂濕州之主山也
州治內有雪峰堂又有列岫堂鄭微列岫堂記云九頂
列於南屏風臺盤列於西巨人橐駝列於東又有練光
臺三臺留題云汶江自微外東繞汶川郡西北出極目
可百里許每朝陽舒彩夜月流天之際一望水光若萬

丈長虹天矯其上而吐吞之也舊有亭曰觀濶據城之
隅不與景會因取少陵賦岷山沱江圖川蜿飲練光之
句以練光題其額云 碑目唐刺史黃堂梁記為寶曆
元年刺史竇季餘大中三年刺史劉成思咸通三年刺
史蓋巨源題又云張延賞修城記載唐大曆十四年吐
蕃大下火焚郊館興元元年張延賞重修其後別駕大
夫修建城宇堡壁雉堞又云唐迴車院碑刺史蓋巨源
撰大中十三年立又云茂州治平寺碑寺舊在外緣叛

羗董阿丹焚毀元豐初移宥城中勝覽云巨人山在
州南三十里山頭有石如人立面南元宗幸蜀時以石
人背立勅令鞭之一百下有九池俗傳是九龍湫其湫
四山環遶百二十里又云雞宗山在州西四十里扼
羗人出入之路熙寧元年置鎮羗寨按宋史熙寧九年
靜州楊文緒導番董阿丹作亂聲援俱絕至書木牌投
于江以告急朝廷遣內使王中正將兵旁出雞宗山擊
之文緒等伏誅碑目云政和丁酉倅貳跨鼇先生李新

目擊靜州之變記載其事甚詳名更生碑今在更生閣
演繁露云蘇易簡言本朝使人至西番見有老人消
縮如小兒伏梁上鷄窠中乃其見在子孫九代祖也其
說甚怪丙申十月十六夜寓直玉堂閱史見貞元間韋
臯攻吐蕃其所攻州名有維保松及鷄栖老翁城予欣
然自笑曰易簡之說豈因此二城名而增飾之耶按寰
宇記茂州西北至吐蕃栖鷄城下或即此處

汶川縣

華陽國志漢嚴皇后為汶江尉成都人仲皇少受學於
皇后及為汶江以書呼皇皇許十月往會夷反斷道皇
期必往經渡六十幾死數四卒得至汶江乃為皇后陳
策俱得免難近欽之按漢武置汶山郡即置縣曰汶江
矣水經註曰江水又逕汶江導汶出徼外岷山西玉
輪坂下而南行又東逕其縣而東注於大江水經又云
江水歷氐道縣北有湍水入焉註曰水出綿道亦曰綿
虎縣之玉壘山呂忱云一曰半浣水也下注江按汶川

本漢綿虜縣地矣 寰宇記云玉壘山在縣南三里又有
玉輪坂其下汶水所經謂之玉輪江山出壁玉即郭景
純所謂玉壘作東別之標者 勝覽云七盤山去汶川
縣九里志云即玉壘關也賈島送玄巖上人歸西蜀詩
玉壘山中寺幽深勝槩多藥成彭祖搗頂受七輪摩去
臘催今夏流光等逝波會當依冀掃五嶽徧頭陀 勝
覽云慈母山在青城山東導江人馮大星與神仙相遇
入隱此山外史云滋茂龍池在汶之尤溪萬山叢立中

有方池週四十里廣幾百畝清水鏡開芳草四積真靈境也登真書云滋茂龍池一曰慈姥在益州西南四百里有靈藥可以已疾山無毒害猶慈姥焉故曰母田況益州龍祠記云蜀之西山有池曰滋茂亦曰慈母以其能興雲雨救旱暵極養百穀而名唐開元中章仇兼瓊旣得平戎城夢一女子謂曰我此城之龍也今弃戎歸唐願有以居我章仇異之表為立祠按總志慈母山在縣南百五十里昔有婦人引子采藥山中虎負其子去母

逐虎不得因長號而絕見者哀之曰慈母也則其所載
又不同矣碑目云滋茂池善應廟碑張商英無盡處士
文其神或傳姓吳或傳姓郭頗有異同 勝覽云龍洞
在牛溪鎮入洞數步向南石壁有穴可通無路可陟掌
洞道人附巨竹一枝於穴內令遊人扳竹而上可達龍池
文同茂州汶川縣勝因院記云繇玉壘南下過策迤西
循皂江左折越太平渡行深入曲無慮六十里至茂之汶
有地曰柘平羣山却立大陸初露畦麻曠稻杳遠空

澤披瑤帶麓壤土鮮潤景物瓌麗人物純篤就其佳處
有院曰羅漢昔有頭陀德欽戒操甚嚴歲臘居久其徒
委散是身獨在常懼其所將底墮落願擇高行屬以香
火得永康軍太中祥符寺僧義海者付之至惟簡師凡
五世也惟簡性顓潔所趣端慎守僧律作佛事癯形晦
面不避風雨遠近四衆咸宗仰之既至此地乃圖宗飾
伐木鐫崖大輯材礎構廣廈設尊像儲秘典納淨侶凡
所欲有一一完具殆逾一紀功力方絕以名上列乃錫

今號庭堂虛敞檐宇飄動丹明碧照續繡岩谷誠歸嚮
之福地而莊嚴之道場也惟簡余之邑人遠來求紀其
事間嘗謂余曰青城諸峰惟大岷最為高厚然丈人上
清之望者乃世俗之所能見爾如吾所居正向其面脉
絡表裏披歛出沒澗壑鉤蔓巒嶺曲折高林巨樾巍崗
險頂晨霞夕靄染漬輝耀湍瀑淙激禽虫啼響一日萬
狀無有窮極鬼眼傾耳不知厭倦此方外清絕之境世
間竒偉之觀而惟簡輒擅有之山林之人所獲多矣安

得君之車馬一至其地以幸吾言之不誣余聽其說袞袞令人喜聞回視此身若處泥滓何時濯洗以從師傲兀於其間哉因命筆綴次其事使歸琢諸岩石遂以為記云熙寧二年十月十五日

威州

漢徼外冉駝之地蜀劉禪時姜維馬中等討汶川叛羌其屯兵之處號為姜維城唐武德七年白狗羌首領鄧賢佐內附於姜維故城置維州以統之至上元之後河

西隴右州縣皆陷吐蕃贊普更欲圖蜀州累急攻維州
不下乃以婦人嫁維州門者二十年中生二子及蕃兵
攻城二子內應城遂陷吐蕃得之號無憂城外史云古維
州在今保縣之外可八十里其對面有無憂城三面臨
江巋然峰頂實諸夷之襟喉中國之要塞也李文饒籌
邊樓故址存焉今棄為外徼矣按偽蜀永平二年改維
川郡為保寧縣徙就中州城即今治也州治後即玉壘
山蜀後主觀湔江至此親書玉壘山三字於州署其大

盈丈左有龍洞焉湔水自玉壘峽出而注為泉有魚長
可徑尺州人以為神魚無敢捕者 本志云州城原為
汶川縣址城內之民半屬汶川城以外純屬汶矣碑目
云鼓角樓記唐維州軍事判官高測文乾符五年十月
十五日維州刺史李光置又云天寶寺碑唐咸通六年
建軍事判官陶師文又云伏波廟碑咸通八年左武衛
兵曹參軍崔遂文俱在維州 張舜民畫墁錄云凡自
岷州趨宕州沿水而行稍下行大山中入棧路或百十

步復出略崖欽崙不可乘騎必步至臨江寨得白江至
階州須七八日其所經皆使傳所不可行攷之山水秀
絕天下無有也臨江寨上望一處當大山中西望雪山
日晃如銀其高無際出衆山上居人曰此雪山佛居也
有獅子人常見之非西域雪山是蜀所記無憂城東北
望隴山積雪如玉耳

保縣

志云姜維築維州城遂築下邑其舊址在南溝之西李

德裕築無憂城重築薛城戍舊址在縣東葬墳壩又
云縣四里編戶七姓耳通化鹽溪已併入州所存者玉
山箭上二里皆畚也近亦叛去按通化縣本唐咸亨二
年刺史董弁招慰生羌置小封縣在西蕃通鶴軍垂拱
二年城為吐蕃所沒今置在威戎軍西宋宣和封西岳
神勅詞云維彼通化地當西極金天氏之分域也即隋之
金川縣矣今屬州為通化里鹽溪縣隋之定廉縣與
金川同置者唐貞觀初改為鹽溪縣以村有鹽溪縣得

採漉今演化禪師所居之地 玉山夜靜恒有霞光冉
冉橫山前東北半壁天皆丹色照林木如畫至旦方滅
俗名為筆架山 箭上在縣東里許一岡斗直而下如
矢曰箭嶺又云箭上即唐之守捉城也亦不屬內地

蜀中廣記卷七